



JUDELLA GEERMAN

S U B I O G R A F I A

Judella a nace riba 15 di januari 1971. E tabata yiu di Sr. Felix y Sra. Fabiana Geerman y e tin 7 ruman mas.

Di chikito caba e tabata un mucha hopi spontaneo, cariñoso, positivo, alegre y yen di energia.

Pa su educacion basico el a bai Colegio San Hose, caminda semper el a sobresali. Despues di a haci su HAVO na Colegio Arubano el a bai Hulanda pa sigui cu su estudjonan.

Despues di a finalisa su MEAO el a dicidi di haci un estudio di HTS-bedrijfskader na Eindhoven. Y ora su famia a kere cu e lo ta cla pa bin biba bek Aruba, el a comparti su gran deseo pa sigui studia un tiki mas.

Pa por financia su estudio universitario (dor cu e no por a ricibi un 'studielening' mas), Judella a traha e.o. na un supermercado, estetisch kliniek, un compania di seguros y tambe e tabata haci skolnan limpi.

Judella tabata conoci como un persona hopi fuerte. Nunca el a laga ningun obstaculo strobe di logra su metanan. Y riba 1 di october 2003 el a logra un soño grandi dor di ricibi su titulo di Doctorandus den Bedrijfseconomie.

Judella a regresa su pais natal y pa algun luna el a traha cu hopi entusiasmo na Centrale Bank.

E fecha 30 di april 2004 lo wordo recorda semper como un dia yena cu nubianan scur. Anochi, ora e tabata festehando cu su amiga y primonan na un nightclub, el a wordo alcansa dor di un bala di skopet cu a cambia su destino pa eternidad.

Judella Geerman lo wordo recorda como un persona cu tabata celebra bida den tur su facetanan.

E tabata un berdadero 'fighter' y su perseverancia, positivismo y fe grandi den Dios lo siguramente sigui biba den e bida di e hobenan cu lo wordo stimula dor di e fundacion cu awendia ta carga su number.

FUNDACION Judella Geerman

META: yuda sostene y stimula hobenan di menos recurso pa nan desaroyo educativo

Ki dia e fundacion a bira un realidad?

E fundacion a wordo funda oficialmente riba 15 di januari 2006, riba e fecha natal di Judella Geerman. Si e tabata na bida ainda e lo a cumpli su di 35 aña.

Ken a bin cu e idea pa lanta un fundacion den su number?

E rumanan di Judella plus algun hende di Centrale Bank, caminda e tabata traha. Un dia despues cu el a muri nos a bini hunto y nos a dicidi cu nos lo kier bai haci algo den futuro, pasobra nos a pensa: "E cos aki no por bay asina". Judella a traha asina duro pa logra su metanan. El a caba di regresa cu su estudio di Economista for di Hulanda y despues di algun luna el a perde su bida tragicamente a causa di un tiroteo dilanti di Havana Nightclub. E fundacion mes a wordo lanta dor di 3 ruman y su mayornan.

Cua ta e meta di e fundacion?

Por medio di e fundacion aki nos lo kier sostene y stimula hobenan di menos recurso (cu ta bayendo scol na Aruba) den nan desaroyo educativo, artistico, deportivo, musical, etc. pa asina yuda nan bira miembronan fructifero den nos comunidad. Nos kier logra esaki dor di brinda nan e ayudo financiero cu nan tin mester di dje. Tambe nos lo kier sigui nan desaroyo di cerca pa asina stimula nan pa semper sigui bai dilanti.

Con boso ta pensa di haya e fondonan pa e fundacion?

Tur aña nos ta pensa di organisa un of dos actividad grandi di fundraising pa asina nos haya e fondonan necesario. Un di nos promer actividadnan ta bai ta un caminata cu ta bai tuma lugar den e luna di april of mei. Y na final di aña nos ta pensa di haci un "X-mas Bazaar", caminda nos ta bai vende articulonan di Pasco. E aña aki nos ta pensa di acerca comercio tambe pa donacionan pa asina e fundacion por cuminsa cu un base solido. Si tin hende cu kier haci un donacion ►

► na nos fundacion, nan por haci esaki via di nos cuenta bancario: **CMB acct. 103.553.602.**

Boso ta bai mester di boluntarionan den futuro pa yuda den un of otro trabao?

Nos ta bai mester di boluntario pa p.e. e organisacion di actividadnan, e parti di fundraising, e trahamento di obranan di man, etc. Interesadonan por yama nos libremente na tel.: 585-3211 (Sra. Wina de Zwart) of tel.: 585-1511 (Sra. Eta Figaroa-Geerman). Tur hende ta welkom...



Notaris Tromp entregando e promer cheque na Wina de Zwart, Presidente di Fundacion den presencia di tata di Judella, sr. Geerman



Miembronan directiva Fundacion Judella Geerman: Presidente - Wina de Zwart-Geerman, Vice Presidente - Marcia Hart-Dijkhoff, Tesorero - Ingrid Geerman, Secretaria - Eta Figaroa-Geerman, Demas miembronan - Marcia Lopez, Irlen Ramada y Jorge Ridderstaat

Advertentie

Computer-accessoires on-line...

www.arusamailbox.com



Arusa Mail Box

Your affordable and dependable mailserviceconnection with the U.S.
Nieuwstraat 34-A - Tel. 583 2459 / 583 0631 E-mail: arusamail@hotmail.com



notaris M.J.C. Tromp

Sancti Orop 38 - Sancti Orop, Aruba

